

**Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarnera pillugu Inatsisartut inatsisaat**  
(Sulisitsisup akiligaanik angalanerit akileraaruteqaataannginnissaat, nalikkilliliisarneq pillugu maleruagassanik allannguinerit, amigartoorutit ukiuni tulliuuttuni ilanngaatigineqarsinnaanerannik sivitsuineq, selskabit piginnittuusut iluminni nuussisarnerat pillugu maleruagassamik qasukkaaneq, erniat nunanut allanut akilikkat ilaasa akileraarutaannik unerartitsisarnissaq, kapitali 3 b nutaaq, selskabit iluanaarutisariataminnik ilanngaateqarsinnaannginnerannik, iluanaarutisiat ilaasa ilanngaatigineqarsinnaanerannik atorunnaarsitsinermik, iluanaarutisiat ilaasa akileraarutaannik appaanermik aamma selskabit pigisat iluanaarutisariatitaasa ilaasa akileraarutaannik atorunnaarsitsinermik imaqartoq il. il. )  
*Aningaasaqarnermut Akileraartarnermullu Naalakkersuisumit saqqummiunneqartoq*

## **pillugu**

### **Aningaasaqarnermut Akileraartarnermullu Ataatsimiititaliap**

#### **siunnersuutip aappassaaneerpeqarneranut**

#### **ISUMALIUTISSIISSUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq A sii Chemnitz Narup, Inuit Ataqtigiit, siulittaasoq  
Inatsisartunut ilaasortaq Jens Frederik Nielsen, Demokraatit, siulittaasup tullia  
Inatsisartunut ilaasortaq Mariia Simonsen, Inuit Ataqtigiit  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Kuno Fencker, Siumut  
Inatsisartunut ilaasortaq Karl Tobiassen, Siumut  
Inatsisartunut ilaasortaq Jens Napaattooq, Naleraq

UKA 2023-mi ulloq 28. oktober siullermeerinninnerup kingorna ataatsimiititaliap sunnersuut misissorpaa.

#### **1. Siunnersuutip imarisaa siunertaalu**

Siunnersuuteqartumit oqaatigineqarpoq 2023-mut aningaasanut inatsisissaq pillugu Inatsisartuni partiit tamarmik isumaqatigiissutaanni immikkoortut ilagigaat nunanit allanit aningaasaliisoqartarnerata 2023-miilli aallartittumik siuarsarneqarnissaa nunanillu allanit aningaasaleerusuttunut aporfissat peerneqarnissaat.

Siuariartorneq annertunerulersinniarlugu suliffinnillu nutaanik pilersitsisoqaqqullugu Naalak-kersuisut siunnersuut aqutigalugu inuussutissarsiutinik nutaanik, minnerunngitsumillu inuussutissarsiutinik avammut nioqquteqartunik, ineriartortitsisoqarnissaa kajumissaarutigiumavaat. Tassunga atatillugu nukimmik tunisassiornissamut erngup nukinganik nukissiorfimmik atuisinnaanerup unammissutigitinneqartalernissaanik kissaateqarnermut atatillugu siunnersuut immikkut isigineqassaaq.

Kiisalu nunatsinni aningaasaqarnerup, inuussutissarsiutinik ikittuinnarnik minnerunngitsumillu aalisarnermik annertuumik aallaaveqartup, assigiinngisitaarnerunissaanik kissaateqarnermut atatillugu siunnersuut immikkut isigineqassaaq.

### Siunnersuummi immikkoortut pingaarnerit

Siunnersuummi immikkoortut pingaarnerit siunnersuuteqartumit ima tullerriarneqarput:

- Ingerlatseqatigiiffiutigisami iluanaarutit akileraarutaasussaangitsut aamma iluanaarutitut aalajangersimasunut ilanngaassisinnaanerup atorunnaarsinnera
- Akileraarutitigut amigartoorutit iluaqutiginnissaannut piffissaliussap sivitsorneqarnera
- Annikitsumik aningaasaliinermut killiliussamik oqilisaassineq
- Erniat akileraarusersorneri (nunami allami akiligassaqarfimmut ernianut akilerneqartunut akileraarutitik akiliineq)
- Ingerlatseqatigiiffinnut nalikilliliinermi malittarisassanik allanngineq
- Sulisitsisumit akilerneqartut angalanerit akileraarutaannginnissaat
- Akissarsianik uninngatitsinermut qummut killiliussamik naleqqussaaneq

### **2. Siunnersuutip Inatsisartunit siullermeerneqarnera**

Siunnersuut siullermeerinninnermi partiinit amerlanerussuteqartunit akuersaarneqarpoq.

Oqallinnermi immikkut sammineqarput nunatta arlalinnik isertitaqarfeqarnissaanut periarfissat, siunnersuutikkut anguniarneqartut pisariusunik inatsisiliornikkut allaffissornerulernikkullu ipitinneqarnissaannik ernnummateqarneq aammalu siunnersuutip suliarineqarnera innuttaasunullu kinguneri. Tamatuma saniatigut angalanerit sulisitsisunit akilerneqartut akileraaruserneqarnerannut atatillugu allaffissornerulersimaneq aammalu taassuma atorunnaarsinneqarnissaata iluarisimaarneqarnera oqallinnermi tikiinneqarput.

Inatsisissatut siunnersuutip ilaa angalanerit sulisitsisunit akilerneqartut akileraarutaannginnissaannut tunngasoq partiinit taparserneqarluarpoq.

### **3. Tusarniaanermut akissutit**

Tusarniaanermut akissutigineqartut inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq.

Inatsisissatut siunnersuutaqqaartoq ulloq 7. juli 2023 tusarniaanermut akissuteqarfissatut piffissaliullugu ulloq 8. juni 2023 tusarniaassutigineqarsimasoq ataatsimiititaliamit oqaatigineqassaaq. Tamanna tusarniaanermut naammaginartumik piffissaliinertut ataatsimiititaliamit isigineqarpoq. Tusarniaanerup qaangiutereernerani inatsisissatut siunnersuut maanna ilusimisut iluseqalersillugu Naalakkersuisunit naleqqussarneqarpoq.

Tusarniaanermut allakkiaq naapertorlugu makku tusarniaaffigineqarput:

Namminersorlutik Oqartussani Naalakkersuisoqarfiit tamarmik, kommunit tamarmik, SIK, BDO, Deloitte. BK Revision, EY Grønland, PWC Grønland, Kalaallit Nunaanni Eqqartuussuserisut, Grønlands Revision, Kalaallit Nunaanni Sulisitsisut, GrønlandsBANKEN, BankNordik, SISA, NUSUKA, IMAK, ASG, AK (Atorfillit Kattuffiat). Greenland Holding A/S aamma NunaGreen A/S.

#### **4. Aningaasaqarnermut Akileraartarnermullu Naalakkersuisup ilisimatitsiffiusumik ataatsimeeqatigenera**

Siunnersuutit ataatsimiititaliamut aammalu Naalakkersuisut suliassaqaarfiannut ataatsimut attuumassuteqartut pillugit ataatsimiititaliap Aningaasaqarnermut Akileraartarnermullu Naalakkersuisoq ilisimatitsiffiusumik ataatsimeeqatigaa. Siunnersuutit taakku ilusiligaanerannik Naalakkersuisut saqqummiussinerannut siunnersuut matumani pineqartoq ilaavoq.

#### **5. Ataatsimiititaliap siunnersuummik suliarinninnera**

Inatsisissatut siunnersuutip teknikimut tunngasortai amerlasuut inatsisissatut siunnersuutip siullermeerneqarnerani qitiutillugit annertuumik sammeneqarput. Tamanna tunngavigalugu Aningaasaqarnermut Akileraartarnermullu Ataatsimiititaliap siunnersuutip ilusiligaanerata saqqummiunneqarnissaa pillugu Aningaasaqarnermut Akileraartarnermullu Naalakkersuisoq oqaatigineqareersutut ilisimatitsiffiusumik ataatsimeeqatigaa.

Inatsisip pisariuneranut paasiuminaassusianullu tunngasumik uparuaanerit inersuarmi saqqummiunneqartut ataatsimiititaliamit maluginiarneqarput. Nunanit allanit aningaasaliinerit siuarsarneqarnissaannik aammalu nunanit allanit aningaasaliinissamat aporfiit piarneqarnissaannik inatsisissatut siunnersuuteqarnermi siunertat pitsaasut pisariusumik inatsisiliornikut maangaannartinneqarnissaat ernummatigineqartoq oqaatigineqarpoq.

Siullermeerinninnermi immikkoortoq, siuliani uparuaatigineqartumut attuumassuteqarsinnaasoq, ataatsimiititaliamit maluginiarneqartoq tassaavoq inatsisissatut siunnersuut innutaasunut pitsaasumik kinguneqarluni qanoq naapertuuttumik atuutsinneqalersinnaanersoq.

Akileraartarnermut inatsisit ilaatigut pisariusinnaammata, aammali inatsisitigut tunngaviup sunniuteqarluartup matussusiisullu pilersinneqarnissaanut tamanna pisariaqarsinnaasarmat, ataatsimiititaliamit ilisimaneqarpoq. Taamaattumillu inatsisip pisariuneratigut inatsisip siuner-

taata maangaannanginnissaa qulakkeerneqaqqullugu inatsisip atuutsinneqalernerani, ilitser-suummik suliaqarnikkut, inatsisip ingerlateqqinneqarnissaa immikkut eqqumaffigineqassasoq ataatsimiititaliamit kaammattuutigineqassaaq. Tamatuma peqatigisaanik piffissap ingerlareer-nerani inatsisip atuunnerata sunniutaasalu nalilersuiffigineqarnissaat ataatsimiititaliamit kaam-mattuutigineqarpoq.

Kiisalu aningaasaliisartut nunanit allaneersut nunatsinni isertitaasa nunatsinni aamma akileraaruteqaataanissaannik periarfissaq inatsisissatut siunnersuutip siullermeerneqarnerani pitsaasutut tikiqqartut ataatsimiititaliamit maluginiarneqarpoq. Taamatuttaaq nunatsinni isertitaqarfiit amerlanerulernissaat kiisalu nunatsinni suliniutit aningaasaliisartunit nunanit allaneersunit aningaasaliiffigerusunneqarnerulersinnaanerit inatsisissatut siunnersuutikkut ammaaneqartoq ataatsimiititaliamit maluginiarneqarpoq. Suliniutit aningaasaliisartunit nunanit allaneersunit aningaasaliiffigissallugit inatsisissatut siunnersuutikkut kajuminnarnerulissasoq tamakkiisuunngikkaluamik isumaqataaffigineqartoq ataatsimiititaliamit oqaatigineqassaaq, aammalu oqaatigineqartariaqarluni inatsisissatut siunnersuutip pitsaaqutissaatut taaneqartut ilumut piviusunngussanersut, taamaalillutillu innuttaasunut iluaqutaalissanersut, partiit ilaannit nalornissutigineqarmat.

Minnerunngitsumillu siunnersuutip immikkoortua taanna kingulleq ataatsimiititaliamit assut pingaaruteqartutut isigineqarpoq. Inuiaqatigiittut aningaasalersuisunik nunanit allaneersunik kajumissuseqalersitsinnaanerput inuiaqatigiit ineriartornerannut assut pingaaruteqartutut ataatsimiititaliamit isigineqarpoq. Tamanna immikkut atuuppoq suliniutini angisoorujussuarni attaveqaasersuutinut tunngasuni, soorlu innaallagissamik mingutsitsinngitsumik, brintiliornis-samik suliniutinut atorneqartussamik, tunisassiornissamat erngup nukinganik nukissiorfilior-nernut. Tamakkuli iluatsinnissaannut pisariaqarpoq aningaasaliisartut nunanit tamalaaneersut aningaasalersuisinnaasullu paasisinnaasaannik iliuuseqarfigisinnaasaannillu akileraartarnermut inatsisitta atugassaqartitsinissaat. Suliassaqarfimmi ineriartornermut Naalakkersuisut sukumii-sumik malinnaanissaat aammalu inatsisip siunertaq naapertorlugu sunniuteqanngitsut paasine-qassapat iliuutsinik pilertortumik aallartitsinissaat ataatsimiititaliamit naatsorsuutigineqarpoq.

## **6. Siunnersuutip pisortanut aningaasaqarnikkut allaffissornikkullu kingunerisassai**

Siunnersuutip pisortanut aningaasaqarnikkut allaffissornikkullu kingunerisassai pillugit siunnersuuteqartup tamanna pillugu isumaliutissiissutip immikkoortuani allaaserisai ataatsimiititaliamit innersuussutigineqarput.

## **7. Ataatsimiititaliap inassuteqaatai**

Siunnersuut akuerineqassasoq ataatsimiititaliami amerlanerussuteqartut Inuit Ataqtigiit Siumullu inassutigaat.

Ataatsimiititaliami ikinnerussuteqartoq Demokraatineersoq ikinnerussuteqarluni ima oqaaseqaateqarumavoq:

*”Siullertut naqissuserlara siunnersuummi, sulisitsisuniit akilerneqarluni angalanerni akileraartarnikkut kiffaangissuseqarneruneq atuutilerseqqinneqarnissaanut tunngasoq, Demokraatiniit tamakkiisumik tapersersortuugatsigu. Angalanernut taakkununga akileraarusersuiniarluni siunnersuusiorsimaneq sinnganermiit tunngaveqarpallaarpoq, maannalu aamma allaffissornikkut nukiluttorfiungaatsiarloq takussuserneqarluni. Maanna inissisimaffik paasineqarmat Demokraatiniit nuannaarutigaarput.*

*Taamaattorli siunnersuutip sinnera ajorluinnarpoq. Pineqartoq sammiveqaqimmat imartoqimmallu paasinarpoq, kisiannili siunnersuut tukanneranut naqissusiisinnaasumik, Aningaasaqarnermut Naalakkersuisup ilisimatitsilluni ataatsimeeqatigineratigut paasinarsivoq immineruunniit siunnersuut sumoqqissaaq iluaqutaaniarnersoq ilisimanngimmagu.*

*Siunnersuuti isumaliutissiissutai nalignnaasut malillugit siunnersuut akuerinerasigut 0 koruuninik iluanaaruteqartoqassaaq. Taamaattorli siunnersuutip allaffissornerujussuarmut annertusaassaaq aammalu IT-aaqqissuussaananeranut aningaasartuutinik annertusaasalluni. Uteqqissavara: Iluanaarutissaaq NUL, kisiannili allaffissornerujussuarmut aningaasartuutinut annertusaassaaq. Akuerineqarsinnaangilluinnarpoq Demokraatiniillu tapersersornaviangilarput.*

*Taamatuttaarlu tusarniaanermiit akissutigineqarsimasuni Grønlands Revision, Sulisitsisut aammalu Grønlandsbanken akerliliissuteqarsimanera aamma immikkut isiginiagassaavoq.*

*Tamanna tunngavigalugu siunnersuut itigartinneqarnissaa inassutigaarput.”*

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Asii Chemnitz Narup  
Siulittaasoq

---

Jens Frederik Nielsen  
Siulittaasup tullia

---

Mariia Simonsen

---

Peter Olsen

---

Kuno Fencker

---

Karl Tobiassen

---

Jens Napaattoq